

DISPUTATIO MEDICA INAUGURALIS,

De

FLATULENTIA,

Quam

DEO T. O. M. CLEMENTISSIME FAVENTE,

RECTORE MAGNIFICENTISSIMO,

SERENISSIMO PRINCIPE AC DOMINO,

DN. PHILIPPO WILHELMO,

PRINCIPE BORUSSIÆ, MARCHIONE BRANDENBURGICO, RELIQUA,

GRATIOSO AMPLISSIMÆ FACULTATIS MEDICÆ
CONSENSU,

IN ALMA REGIA FRIDERICIANA,

PRÆSIDE

DN. GEORGIO ERNESTO STAHL,

MED. D. ET PROFESS. PUBL. ORDINAR.

Dn. Patrono, Præceptore ac Promotore suo,

omni Observantiae cultu ætatem prosequendo,

PRO LICENTIA

Jura ac Privilegia Doctoralia Majorum more
assumendi,

Publicæ Eruditorum Disquisitioni subjiciet

JOH. ADAMUS KÜLBEL,

NERCHAV. MISN.

Die Octobr. A. MDCCVIII.

IN AUDITORIO MAJORI,

Horis ante - & pomeridianis.

Δ

01

10

20

30

40

50

60



PROOEMIUM.



I usquam ullum est studium, in quo *causarum verarum* iusta Notitia, ita distingvenda est, à vago & inutili scrutandi, & aliena quælibet affectandi, studio, certè *Medica Pathologia* hoc esse debet; quæ non circa nudam otiosam *scientiam*, quæ propriè nihil dat, nihil adimit, sed solùm agitur, *ne nihil agatur*, occupata esse debet: verùm circa talem cognitionem, ejusmodi *causarum*, versari, quæ partim ad *Præcticum* usum, partim ad *Prognosin* verè rationalem, non quæ fieri possunt, sed quæ solent, imò quæ etiam ita, & non aliter habenda sunt, dum *Ars* in ea planè nihil potest, apprimè necessariæ sunt scitu. Dolendum autem certè meritò est, quòd ita, non vulgaris solùm, sed verius vulgata planè, & vulgo quasi commendata, obiervetur, ita penitus *contraria* ratio, ut nihil passim minùs in considerationem vocetur, quàm vel *remotissima* in ordine ad *influen- dum*, vel *generalissima*, in ordine ad *existendum*, causæ: neglectis veris *propinquis*, talibus inquam, in quas jus aliquod pateat *Arti*, aut ad minimum *Consilio* ejus, secundum ta-

les causas scitè instruendo. De *Machinula* Horodictica
 usuali, spiris elasticis, ex more, instructa, causas enumera-
 turus, si memoraret, constare illam è *spira* hujusmodi
elastica, & *rotulis dentatis*; licet verum ita diceret, ta-
 men ad *effectum* de quo est quæstio, nihilò plus dixisset,
 quàm si *Machinam affatoriam* pro *Horologio* commendâs-
 set. Qui verò demum *causam* elasticitatis in illa *spira*, *ma-*
teriam rotularum & axium, allegaret, quamvis etiam hîc
 de rebus loqueretur, quæ necessariò sunt & esse debent;
 tamen nemo utique rationis rectæ compos, crediderit,
 quòd ab his *directè* pendeat, vel *dimensa* illa horarum *ex-*
quisita distinctio, vel quidlibet tandem, quocunque modo,
 ad *Artificium*, sive *struendi* tale Organon, sive illò *utendi*, ul-
 latenus utile, nedum necessarium. Cum potius, & *pro-*
portio numeri Dentium, & *ratio energia* Elateris, & *equatio*
 hujus per *Æquilibrium* tanquam Antifacoma vibratile,
 & tandem *energia* Elateris etiam specialissima *temperies*,
 intentione & remissione ejus judiciosè *determinanda*, to-
 tam rem proximè absolvat. Et tamen interim quàm ma-
 xima adhuc differentia, firma & illibata maneat, inter *cla-*
borandi atque è debitis materiis *efformandi* hujusmodi o-
 peris habitum; & contrà, nudam ejus *directionem*, sive
 temporariam, aciculâ indicatoriâ, quoties aberrat, tan-
 tisper in ordinem reductâ: sive *Elateris* ipsius, magis soli-
 citâ, si non nihil remiserit, adductione spiræ, præstanda
 intensione: sollicitâ dico, nempe repetitis tentaminibus
 tandem ad quæsitam *proportionem* perducendâ. Pariter
 profectò se res habet cum Medicis *causarum* enarrationi-
 bus. Siquidem alienissima profectò hîc est, & quod re-
 ctè moniti imperiti non possint non stupere, *materialis*
 habitus Corporis, tam in *Mixtione*, quàm in *Structura* sui,
 pro-

prolixa consideratio aut allegatio: Si nempe consideretur, quod uterque horum habituum, directe *contrario* modo sese habeat, ad illud, quod in ipso omnino fit: *corruptibilitati* inquam magis, quam ulla propemodum alia res sub sole, subjacens, & *fragilitati* atque multiplicibus *impedimentis*, totus expositus existens. Dum interim nihilo secius tam *corruptio* illa, quam actualis *confractionis* aut *constipationis* eventus, adeo, velut ad miraculum, est rarus, ut pro hujus *propinquiore* causa, illos habitus allegare, propemodum rationem nudae *contrarietatis* habeat. Neque verò etiam rationem Corporis quatenus *Vivum* est simpliciter, ad eventus ullos peculiares allegare sufficit; quandoquidem etiam hæc, (tardè tandem qualitercunque intellecta) ratio, tamen ita inter manus iterum perit, dum deinde vanæ illæ speculationes substituuntur, quasi ita fictus *vitalis motus*, non possit, nedum non soleat aliter lædi, quam simplicibus *passivis*, *corporeis*, *directè agentibus*, impedimentis objectis. Cum sola verior, (quamvis ita ipsa etiam adhuc *generalissima*) ratio, simpliciter magis versetur, in longè plurimis certè, & ante omnia maximè fonticis, Affectibus in respectu *continuanda Vitæ*, & Corporis revera *conservandi*, non tam solum ad nudum *actum* vivendi, quam ad diutinam ejus *continuationem*. E qua demum *destinatione*, non solum simplices & *ordinarii*, varii, placidi successivi *Actus* prognascuntur: sed etiam multiplices *extraordinarii Conatus*, quam maximè *activi*, & bonæ non solum, sed etiam *justæ, intentionis*. Qui, demum per *accidentales* depravationes & impedimenta, perperam succedentes, nihil circumspectæ, magis inspectioni nudæ, quam considerationi, glaucoma deinde objiciunt, ac si universum ne-

gotium penitus, ab hujusmodi *accidentalibus*, intercedentibus demum, causis, verè dependeret. Ne verò nimium prolixi simus, sed Prooemii limites potius observemus, nihil amplius nisi hoc unum dicemus, quod ingens exemplum alienarum hujusmodi speculationum occurrat etiam in Negotio, vulgò quidem non adeò operosè explicari solito; imò verò etiam passim admodum alienis opinionibus ita in transversum acto, ut inde vero Practico usui non parva detrimenta immineant: interim, cum certè & satis sæpè occurrat, & malè procedens, aut perperam tractatum, etiam formidabiles passim turbas concitet & efformet, veriore omnino modo æstimationem promerente, nempe FLATULENTIA, seu facili ad concipiendos flatus in intestinis, dispositione. Quam proinde rem minimè indignam duximus, quam SOLENNI SPECIMINE, ita suis causis restituamus, ut inde, & qualia quantaque incommoda ab hoc vitio oriri possint, & qualia iis remedia verè quadrare atque satisfacere possint, secundum veram illorum indolem apparere possit. Deum autem precamur, ut etiam in noxiæ hujus rei vera indole manifestanda, & justis adversus illam consiliis dirigendis, quæ vera sunt perspicuè monstrativis, clementer adesse velit.

§. I.

DE FLATULENTIA dicere dum aggredimur, etiam non exoratâ pace ineptorum Magistrorum, qui de minùs usitata vocabuli *terminatione* Crises elucubrare possent; magis de *acceptione* vocabuli extra scabella scholarum, præmittere quædam necesse habemus, ut ita constare possit, quò sensu nos ipsi illo uti in animum inducamus. Equidem

dem extra dubium collocamus, quod ubilibet, *Flatuum* nomine, intelligatur *halitiosa elastica* seu *expansionibus* apta, & in hoc *aëree* indoli accedens, substantia. Quò quidem sensu aliquibi ita usos esse Antiquos *Flatuum* vocabulò, ut posteri, pro suis acceptionibus plane de *spiritibus* sermonem fuisse interpretari necesse ducant, non ignotum est. Quousque verò etiam *Hippocrates*, *Flatuum* nomen atque efficaciam extendat, peculiari schedio, ex ejus lectione satis liquet: tantò magis autem è laboriosis subsidiis Posteritatis, quæ, partim ut *Autoritatem* velut infallibilem tanti Viri sequeretur, aut tueretur, partim proprias suas opiniones ita exprimeret, *Flatus* non solum in omnibus partibus Corporis, tum oboriri atque generari, tum alibi natos eò deferri, tum tanquam in transitu, ibi tamen inolescere & graviter tumultuari posse, laboriosis conceptibus adumbrare defudavit: vel planè in subsidium adhibitis phænomenis *Antliæ Pneumaticæ*; nisi quòd non valde seria cuicunque conceptui hinc oriri possit applicatio, dum utique defectus pressionis Atmosphæræ, circa unum aliquod Membrum, ut ita *aër* sanguinis, ut loquuntur, ibi expandi, & turbas dare possit &c. *Hippocrates* cordi nusquam habuit. Has, inquam, ita vel *generaliores*, vel applicatione supposititiâ demum *specialiores* redditas ipsò usu, Acceptiones, nos pro præsentis nostro negotio nostras minimè facimus.

§. II.

Ubi nempè breviter iterum monere licuerit, ut duplicem circumstantiam concernentes animi adversiones adhiæantur; nempè 1.) circa *speculativas* ratiocinationes ipsius *Hippocratis*; 2.) circa explicationes, allegationes, & applicationes hujusmodi rerum, quæ magis ad *opiniones*, quàm ipsarum rerum nudam *commemorationem*, ita uti reverà sunt, occupantur. *Hippocratem* certè ipsum, in enarrandis rebus ut in se existere sentiuntur, rariùs incerta & valdè ambigua, rarissimè omnium *facta*, communissimè autem *vera*, minimè tamen tamen eadem frequentia *plena*, cum omnibus eò pertinentibus etiam

rea-

realibus circumstantiis, protulisse, pro certo habemus observa-
turos esse omnes, quicunque Praxi solidâ & solerti potiuntur.
Mirificè autem diversam esse ejus dexteritatem plerisque in lo-
cis, ubi ad *causas* talium phænomenon constituendas animum
applicat, possumus propemodum testes citare plerarumque
recentiorum scholarum Medicarum sectatores : Nisi quòd
Sylvianorum conceptuum fautoribus, inventum centum
broum mactatione dignum, imò ex intimo adyto profectum
videatur Oraculum illud, de *μυρίοις ἄλλοις*, seu modestiore
Latinorum in diem loquendi modo, *sexcentis* aliis, nempe
præter *Acidum, acrem, amarum, insipidum*, saporibus, seu *po-
testatibus* salinis : seponendo interim minus commodam, licet
prudentem, boni Senis admonitionem, quod nihil horum vel
metuendum sit, vel præter meritum insimulandum, nisi quod,
in suo quodlibet genere, *excellat*, imò *excedat* Energiâ, ut in-
ter acria *acerrimum*, inter acida *acidissimum* &c. Quamlibet
plerique etiam in hoc proposito ab Autore illo discrepent, &
quidem, uti propemodum liquidò apparet, maximè è malè in-
tellecta ejus mente; dum ille quidem planè rectissime asserit, &
quidem decentissimè, pro disputationis ibi adornatæ scopo
quòd, si tales res in corpus irrumpant, *possint* illud
utique variè afficere : minimè vero, quòd hi deinde
sibi sumunt, ubicunque corpus malè affectum sen-
tiatur, illud ab hujusmodi rebus ipsi evenisse putandum sit. In-
terim actuales certas atque veras corpori ingruentes læsiones,
simpliciter magis à *bilis*, nequaquam tamen ita *μυρίοις τρόποις*
versatili corruptelâ, arcessit *Hippocrates* : quæ proinde his uti-
que non æque placere potest; tantò minùs, cùm plerique *al-
calicam* illam, aliqui etiam penitùs *balsamicam*, velint. Cæ-
terùm etiam in hoc negotio vix quidquam usquam fingi pos-
sit, quin generale aliquod, & frequentissimè etiâ violenter tor-
quendum, vocabulum in *Hippocrate* conquiri possit, quod,
dum ita sibi favere volunt, eò ipso satis demonstratam esse sen-
tentia suâ, non tam ab Antiquitate *Autoritatem*, quàm dire-
ctam

Etiam atque solidam *veritatem*, credunt. Quam tamen rem omnes, quos ipsa Praxis veritates docet, meritò contemnunt.

§. III.

Ubi nempe secundum, quod antè innuimus, offendiculum, in eo utique consistit, quòd passim hodie, licet tamen inter pauciores, mos ille diligatur, ut una vel altera *lacinia Hippocratica*, etiam ab antecedentibus aut subsequenter, imò interdum alibi parallelis, locis, avulsa, correpta, per frequenter etiam propriis interpretationibus deformata, non solum contrà reliquam, sed imprimis contrà *sinceram* atque *constantem*, mentem Autoris, in medium producta, scenæ fervire cogatur. Ubi nempe meritò, tam in *Hippocrate*, quàm multis aliis multorum scriptorum Autoribus, peritè utique atque solerter aestimare convenit, imò decet potius & necesse est, quomodo occurrentes hìc illic apud hos locutiones, ab iisdem ipsis, in reliqua sua deductione, *in usum* tractæ, & ipsâ re reliquæ suæ *prosecutionis*, retentæ, adeoque veræ illorum acceptioni plena *autoritas* conciliata, reperiatur. Siquidem aliàs, quæ citrà, imò contrà reliquum veluti *systema* totius talium Sententiæ, hìc illic in eorum Scriptis, ita oberrant, decerpere, minimè quidem, hodiernis imprimis moribus, infrequens, nedum insolitum, existit: interim reverà talibus, ab ipso Autore in nullum certum & constantem usum deductis, imò vel planè cum reliqua Summa ipsius conceptuum pugnantibus, nihilominus pro *autoritate* aliis opinionibus adstruenda uti velle, alibi quidem imprudens & absurdum, alibi etiam imprudens & malitiosum esse posse, monuit Dominus D. Præses Schediasmate *Vindiciarum Scriptorum suorum*.

§. IV.

Quemadmodum itaque ipsis his respectibus penitus inane ducimus, quibuslibet *Hippocratis*, aut quorumcunque tandem Autorum, fragmentis, temerè allegandis, & in sensum, ipsis vel nequaquam, vel non satis & ingenuè, cognitum aut receptum, detorquere: ita tanto minus horum quidquam

admittere placet, circa hoc Negotium, ubi non alienis huiusmodi, & quæ nobis minimè probantur, opinionibus, quorumcunque tandem Autorum, tempus impendere animo propositum est: sed potius simplicissimam, & maximè notam atque receptam *Flatuum* significationem simpliciter retinere: illorum inquam, qui in *abdomine* geniti, varium, illic *primò* & *primariò*, negotium faceffunt; *consensu* tamen etiam hinc inde passim sese diffundente, seu potius quoquo modo exerente. Unde tam de *Flatulentia* illa, imprimis ceu facilè & familiariter obvia suppositâ, *Sanguinis*, nec non *artuum*, & partium *porosarum*, (à qua etiam ante *ten Rhyne*, quasi novum huius opinionis promachum, plures notum est *arthritica* pathemata arcessere) quàm à vulgo narratis discursationibus, *Vaporosorum halituum*, quos vulgus hominum in *Cerebro* & ore habet: quin etiam veris, sed rarioribus, *Vesicæ* & *Uteri*, *Flatibus*, hòc locò sermonem habere non recipimus.

§. V.

Flatus autem in *Abdomine* gigni soliti, sumunt originem suam maximè in ipsis *Intestinis*; ibique familiariter *sedem* etiam suam retinent, & progressum servant: rarioribus multò exemplis occupant etiam aliquando *cavitatem* ipsam *Abdominis*, eamque in ingentem molem distendunt. Hi ipsi, non tam simpliciter *Intestina* distendendo, sed supervenienti acriori *contentioni* *Intestinorum*, indole suâ *elasticâ* obsistendo, autores passim sunt exquisitissimorum *dolorum*. Familiarissimè verò introducunt sensus illos *volutionum* strepentium seu *borborygmore* in hisce partibus, *deorsum* tandem erumpentium: aliquando etiam *sursum* enitentium; non per invias illas vias, directè & simpliciter ad *Caput* & *Cerebrum*: benè verò per ipsum *Oesophagum* extrà *Corpus*, notò *Ructuum* nomine.

§. VI.

Hi tales *Flatus*, merentur omninò non malè hoc ipsum nomen, cùm non solùm *Ventositatum* more volutentur atque dis-

discursent, sed etiam *erumpant* passim è corpore. Utrum autem verè & simpliciter *aëreæ*, sine omni tropo, sint profapiæ, non jam statim tanquam præjudicialem formabimus quæstionem, sed potius ipsi deductioni hoc reservabimus: tantò magis, cùm etiam hæc ipsa consideratio, Medicum usum reverà simpliciter nullum habeat, sed otiosa potius existat: propemodum autem de hac materia multum in casum argutari, & quasi litigare, vel propter malum exemplum cavendum videatur, ne Scepticis occasio detur ad Sarcasum, tanquam Medici de omnibus rebus disquirere, imò contendere deberent, unde hæc potiùs, in hoc quidem respectu, Physicis cancellis relinquimus. Ut autem ad rem dignioris considerationis aditum faciamus, reminiscimur antè omnia istius peculiaris circumstantiæ, quòd *Flatuum* proventus sit negotium, non promiscuè quibuslibet hominibus ita familiare, ut tanquam *indifferenter* in quoslibet cadat: & imprimis quidem sine *externarum* quasi *singularium* causarum, peculiari planè concursu: sed omninò satis *infrequens*: ad minimum in tali conditione atque constitutione, ut *opem Medicam* etiam mereantur, imò requirant. Quæ res ut tantò melius explicationi *Medico-Pathologicæ* quadret, è re erit ante omnia *historiam* Flatulentiae commemorare; ut ita etiam, quid de ipsa verius existimandum videatur, meliùs apparere possit, neque inconveniens conceptus de ipsa *indole* & moribus Affectus, præjudicium quasi objiciat circà *ortum*, & qualescunque rationes reliquas, ejusdem.

§. VII.

Antè tamen, quàm propiùs rem totam aggrediamur, monendum utique ducimus, quòd non tam simpliciter & absolute de *Flatibus*, quàm, secundum tenorem tituli, de *Flatulentia*, agere constituerimus: nempè *promptâ* ejusmodi, & *copiosâ* insuper, non tantùm *Flatuum* genesis: sed etiam variis ulterioribus & pejoribus posthàc consecutionibus ceu Symptomatibus. Quandoquidem nempè non tam *Flatûs* in genere, quàm *Symptomata* illorum, præcipuum negotium fa-

cessunt, atque ita considerationem Medicam exigunt: hæc verò nusquam etiam plura & ferociora, & qualia maximè hanc opem postulent, occurrunt, quàm in tali *insolente* maiore vehementia & *promptitudine* *proventus* eorum.

§. VIII.

Consistit autem ita tanquam *historia* seu factum ipsum *Flatulentie*, in eo, quòd sic affecti, tum per varias alias occasiones, tum etiam veluti spontaneis quibusdam exacerbationibus, jam *volutatoriis* quibusdam *strepitibus* per Intestina, jam contumacioribus quasi *stasibus*, utrinque *tensionibus* & *contentionibus*, quin tandem etiam, ex harum pervicacia, *doloribus* penetrantibus, jam quasi *volutatoriis* & *tortilibus*, jam *tensivis*, veluti *ruptoriis*, afficiantur: donec tandem, vel in *leviore* maximè malo, iterum *subsideant* expansi illi vapores; vel, ut in *graviore* cum primis malo, aliquà, sive sursum, sive deorsum, *erumpant*.

§. IX.

Obnoxii autem sunt *Flatulentie* in genere, quicunque ad *mutationes frigoris & caloris* admodum sensibiliores existunt. In specie verò, nempe ad magis jam quasi fonticam Flatuum *vehementiam*, *Fæminæ*; non tamen promiscuè omnes, sed illæ, quæ *Mensum* suorum justos successus sensim amittunt, aut certè sensibiles circà hoc errores experiri occipiunt. Porro, quæ minùs circumspectæ diætæ, sed potius varii generis intemperantiæ, indulgent, circà *fructus horæos*, *dulcia mellita*, *pingvia*, *frixa*, panem à clibano calidum, *placentas*, & cerevisiariis *fecibus* fermentatas pastas &c. Tandem autem eveniunt etiam *Flatus*, multi, & magis magisque adsvetudini insolenti propiores, *Viris*; tum vulgò *Hypochondriacis* dictis junioribus, tum *Hæmorrhoidariis*, *Nephriticis*, *Ischiadicis*, *Podagricis*, annosioribus.

§. X.

Meritò verò distingvimus ulterius *Flatulentiam*, *torpidiorem* & quasi simpliciter *stupidior*em, nempe parvi, aut
pla-

planè nullius *sensus* compotem; quantumlibet etiam interim satis & *copiosam*, & *pertinacem*: à Flatulentia *vagâ* quasi, & omninè *varii impetus*, adeoque *contentionibus* quibusdam peculiaribus ita addictam, ut modò, tanquam propter leviores etiam occasiones, vehemens *contentio* concitetur, aut recrudescentibus subinde *contentionibus*, omninè verò Flatuum distensionem ita supervenientibus, sensibilia inde exquisita *dolorum* incommoda passim cooriantur.

§. XI.

Prior species, sectatur imprimis *temperamentum*; uti vocant, *Phlegmaticum*; & tam fluidarum, quàm solidescantium partium, ab illarum commercio, *serosiorē* dispositionem. *Posterior*, evenit magis *Sanguineæ*, cum *Cholerica* & *Melancholica* colludenti, indoli.

§. XII.

Quemadmodum autem *Flatulentia*, utique originem suam debet *Flatibus*; utpote nihil aliud existens, nisi horum *insolentior* atque *copiosior* concitatio: ita, dum de hac disquirere suscepimus, postulat propemodùm necessitas, ut etiam de illis aliqua dicamus, quæ ignorari non possunt, nisi totum negotium, ceu præjudiciò quòdam, obscurum habere velimus. Erit itaque prima, imò primaria quæstio, quomodo ipsi *Flatibus* fiant, & unde originem suam ducant?

§. XIII.

Nemo autem à nobis expectet, ut nimium prolixè tanquam ex instituto harum causarum vulgò usitatas præfigurationes, sive κατὰ πρόδα sequamur, sive etiam prolixè refellamus: imò ne quidem solum nimium curiosè commemoremus. Suffecerit autem brevibus, totum, ut speramus, rei nervum, ita expedire, ut in quo maximè deficere vulgares opiniones nobis videantur, tantò melius dilucescere possit. Afferimus nempe, quòd quicumque adhuc hac de re solennes quasi quasdam & vulgò ita magis receptas sententias proposuerunt, communissimà in hunc diem totius Physicæ atque

Medicæ Scholæ offensione, ad nudum *materiale* habitum mentem dirigendo, non solum negotio minus satisfecisse videantur; sed passim etiam ipsum suum propositum graviter frustrati sint & in illo defecerint.

§. XIV.

Antè omnia nempe, dum perpetuò de *materiali* causa verba faciunt, obliviscuntur, nullò rei meritò, certissimæ præcipuæ conditionis totius negotii, quæ est fistulæ Intestinorum *distensio*. Hanc dum, veluti nihil ad rem pertinentem, quasi fusque deque habent, faciunt quidem quod solenniter solent, ut nempe quibuslibet *materiis*, quodlibet liberum jus in Corpus humanum non solum concedant: sed nominatim, quaslibet *movendi* Energias, & temerè *inducendos motus* Corpori, materiis ita asserant: Summa interim in Corpus, quatenus *vivum* est, injuria; quam illud, nullâ aliâ re vindicat, quàm placidissimâ methodò, ad confundendas improvidas imputationes, *veritate*, & unicè constanti, *Energix Motuum suorum adversus omnis generis materias*, vividâ prosecutione.

§. XV.

Altera, quam designavimus, difficultas, versatur etiam passim in *materia*, quam arguunt, impari prorsus ad hujusmodi effectus temperie, quam ipsi tribuunt. Dum non solum inde ab Antiquitate, sed etiam inter ipsos propiores, ne Sylviò quidem & sequacibus ejus in diversum tendentibus, *materiam* pro Flatibus concitandis, accusent *segnem, lentam, tenacem*; nempe sic dictam Antiquis *pituïtosam, mucidam, spissam*: quæ firmiter ita Intestinis adhærendo, *Flatus* producat. Qui *rationem* desiderat, quònam verosimili modò talis materia hos effectus edere possit putanda sit, Antiquiores quidem ipsos adire poterit, cum nobis certè patientia desit ad hujusmodi res memorandas: Illud autem monere forte suffecerit, quòd ipsi Veteres, non ita obscurè digitum quasi intendere videantur, ad *molestiæ* cujusdam intercessionem, quàm talis materia *Intestinis*, imò in Intestinis ipsi *Naturæ*,
ob-

objiciat. Recentiores autem, neque pauci, nec postremi, quæ-
runt quidem etiam in *viscosa* hujusmodi *materia*, peculiarem
planè causam *coagulantem*, nempe *aciditatem* vehementem;
imò in hac ipsa etiam *Energiam Intestinorum stimulatricem*:
Licet autem ita *torminosis* consecutionibus qualitercunque
satisfacere videretur; quomodo tamen *Flatulentæ* simplici
consecutioni prospiciant, etiam ab illis, tanquam ex instituto,
expectandum. Interim iterum monemus, ut omninò etiam
hujus rei *ratio* aliqua, observatio inquam, non perfunctoria,
habeatur, quomodo hinc inde utrique horum, tam Antiqui
quàm Recentiores, passim respectent ad concurrentem in his
negotiis IRRITATIONEM.

§. XVI.

Sicut autem plerique ita *matariarum* imprimis vitio *Fla-
tulentiam* tribuunt; ita moniti tamen etiam aliqui, *viarum*
certè quoque, nempe partium, rationem habent, dum per ar-
gumenta convincuntur, esse hoc necessarium. Ne tamen
monitis id debere videantur, fanè peculiare comminiscun-
tur rationes; nempe *Spasms* affici volunt Intestina, unde ita
densatis illorum tunicis, & consequenter poris, halituosa ma-
teria, dum per poros exspirare non possit, Intestinum ipsum
dilatet, atque ita *Flatum* intùs formet. Inutile autem puto
fuerit monere, quotuplices novæ difficultates ex hujusmodi
præfiguratione resultent. In ipsos enim certè veluti sensus
utique incurrunt *duæ* decumanæ; una, *physica*, dum ita simul
præsupponitur, tam *copiosam*, & quidem ita crassò modò *ela-
stico-halituosam*, materiam, tanquam omni tempore, aut sit
ita, quando etiam præter Ordinem Oeconomiae Corporis,
à certis extrinsecus admisis, in Intestinis versatur, *secundum
naturam*, per ipsam *porositatem* illam *Intestinorum*, imò ipsius
Abdominis, verè ita per *transversum*, (Halitus, non *humidi*,
sed *flatulenti*, formâ) evacuari. Ita enim certè necessum
esset fieri, dum nemo nescit, quòd materiæ quæ vulgò Flatuum
conciliandorum quàm maximè compotes judicantur, nequa-
quam

quam simpliciter in quibuslibet hominibus hunc effectum edant, sed vix in decimo quoque homine, imò non errabimus, si dicamus Centesimo: ubi utique secundum hanc hypothesin, nulla alia reddi posset ratio, nisi quòd *Flatulenti* illi halitus, qui utique ab hac *materia æquali*, *physicè* æqualiter, singulis hominibus eveniant, in plerisque quidem, nempe rectè propterea sanis, *liberum illum exitum* assequantur, ut per patentes illos texturæ Intestinorum *poros*, in *abdomen*, & per hoc etiam extra totum corpus, diffrentur: apud aliquos autem solum, in quibus pori illi Intestinorum, *Spasticâ* fibrarum stricturâ ita obstipentur, in cavitate horum detenti, effectus suos distensivos exerant. Ubi verò, ne tempus amittamus, minimè placet prolixius designare, quomodo Sententia hujusmodi circa *proventum* maximè elasticæ talis materiæ, novas difficultates experiatur, quando è Praxi quotidiana animadvertitur, quòd mirus sæpenumerò proventus *Flatuum* sese sistat, *exinanitis* quàm maximè Intestinis; è quibus adeò nihilominus tantam Flatuum copiam & *prognasci* posse, & aliàs magis *secundum naturam*, crassâ illâ exhalatione *evacuari* sole-re, aliis propemodum argumentis, quàm simplici præsuppositione stabiliendum esset, si quæ esset probandi intentio. Sed alii de his videant.

§. XVII.

Alterâ, nescio gravissima, an crassissima, difficultas, *mechanica* est: nempe, quomodo, dum fibræ Intestinorum, & per illas *pori* eorum *stipari* supponuntur; quod utique secundum simplicem conceptum *mechanicum* idem dicit atque fibrarum talem *contractionem*, quâ inter se invicem propius admotæ, qualiumcunque rerum transitum, per qualiacunque aliàs inter ipsas concessa *interstitia*, hâc ratione reverà restringant seu reprimant: Quomodo, inquam, stantibus his, imò verò pertinaciter perstantibus fibrarum *stricturis*, ita exquisitis, ut etiam *inter se mutuò* quàm maximè *densentur*: nihilò fecius, & nihil usquam obstante pertinaci tali strictu-

stricturâ, Intestina, *fibræ* inquam *Intestinorum* spasmo tali contractæ, non solum liberè atque facilè distendi possint: sed etiam in ingentem subinde, communissimè verò certè insignem, amplitudinem. Sicuti vix homo utique est qui nesciat, quàm promptè æque atque familiariter *Flatus*, in hominibus de reliquo etiam reverà ad omnem sensum *sanis*, abdomen subinde in notabilem distensionem attollant, etiam sine ullo sensu reliquo distincto. Ut nihil dicamus de illa sic supposita *physica* difficultate, quænam *materia*, in qualibuscunque tandem concretis, supponi possit ita vehementer *elastica*, quæ *spasmo affecta* Intestina tam vehementer distendere valeat, id est, adversus fibrarum Intestinalium tam potentem *rigorem*, quasi eò ipsò tantò potentius & efficacius agere, ut etiam hic suppositus spasticus *rigor*, quasi nihil esse videatur, adversus illam *expansoriam violentiam*: quod non solum *facilitas*, sed etiam præsentanea efficacia *distensionis* flatulentæ, affatim testari possunt.

§. XVIII.

Sicut autem nostra intentio nequaquam fert, varias opinioniones, & quicquid in illis perplexum est, scrutari; sed sufficere omninò nobis poterit, ex ipsarum potiùs rerum justiore consideratione, simplicissimis comparisonibus atque collectionibus, deducere, quid nobis circa hæc non verum solum, sed etiam evidens quasi videatur: Edisseremus igitur ita hæc methodò, ante omnia quid circà *Flatus* in genere: & deinde circà *Flatulentiam* in specie, perpendendum videatur.

§. XIX.

Flatus quod attinet, non tam solum in illis respiciendum utique venit ad *materiam* illorum; utpote quam omninò scrupulosè quasi conquirere, minimè necessarium, aut certè parùm impeditum existat: quàm ad *habitus* omninò ipsorum Intestinorum ergà *distensionem* ita subeundam. Certè enim ad subeundam ejusmodi *expansionem*, non magis effica-

cia materiæ *elastica*, quàm facilitas ad *cedendum* in ipsis Intestinis, absolutâ necessitate requiritur.

§. XX.

Cùm autem *vivum* Corpus, nusquam, simplici sibi relictâ tanquam fluxâ molliæ, polleat; sed ubilibet *vividâ tensione* ita affectum sit, ut, nisi à notabili ponderis aut pressioni *activitate*, minimè ita facile cedat: Est fanè proinde etiam necessariò ita considerata hæc talis in Intestinis etiam hoc tempore *cedendi* promptitudo, ut ita Energia distensoria *locum inveniat*, & in actum deduci possit. Ponimus itaque certè pro vero fundamento eventus *distensorii*, *Receptivitatem* hanc Intestinorum; quâ illa effectui cuicunque distensorio obsequantur: *Remissionem* nempe *Toni* usitati, notabilem. Minimè verò *equalem* per totum ipforum tractum, sed omninò passim planè *partialem*. (Ubi iterum obiter indicamus, insignem etiam illam difficultatem antè dictæ speculationis de *Spasmodum* Intestinalium efficacia, ad producendos *Flatus*. Cùm enim circà hos nihil magis palàm evidens existat, quàm, quod passim exquisitissimè *particulariter*, in *portione* aliqua solùm Intestinorum cooriantur; nemo puto facile comprehenderit, quid impediturum sit, quò minùs in uno aliquo loco producti *Flatus*, liberè perrepant ad reliquam *longitudinem* Intestinorum, & ibi nihil impeditam suppositam illam liberam *evaporationem* promptè assequantur.)

§. XXI.

Hæc inquam *Toni* usitati Intestinorum *Remissio flaccida* atque *torpida*, nobis utique est fundamenti locò, quâ in aliquo Intestinorum loco permissâ, facile utique sequatur *distensio*, à materia *spumido-aërescenti* elateri utique apta. Sicut enim jam pridem D. D. Præses in *Dissertatione sua Inaugurali de Intestinis* denotavit, quòd status Intestinorum proprius, omninò secundum naturam, non solùm sit *vacuus*; sed etiam actuali *peristalticâ stricturâ contentus*: quamvis ita placidâ, ut *distensioni*, mole, pondere, & pressione, incumbentium re-

rum,

rum, imprimis autem modestè *successivæ*, obsequatur: immodestiores autem *repentinæ* distensiones, etiam satis familiariter repentè contrà oppositâ fortiore actuali *constrictione*, depellat: Ita habet se revera negotium etiam in ipsis *Flatibus*; Ubi, si alicubi etiam hæc ordinaria *contentio* remittatur, adeoq; ille locus, *Flatuum* expansioni, atque inde sui ipsius etiam distensioni obnoxius fiat, tamen eò ipsò non simul & pariter etiam per totam reliquam cavitatem æqualis pateat aditus: sed potius tam in *superioribus* quam *inferioribus* ab hoc loco dimensionibus, manens *consuetus* peristaltici *Toni* tenor, notam illam & quàm maximè tandem revera gravius graviusque *spasticam*, illorum, *Flatuum* inquam, intrà unam portionem, conclusionem atque detentionem, post sese trahat.

§. XXII.

Hæc certè constitutio, uti *Flatuum* vero ortui primariam veluti portam aperit, ita simpliciter absolvit *Flatulentia* Genealogiam: ingentis nempe, & magis magisque etiam penitus *enormis*, *promptitudinis* ad concipiendos *Flatus*. Cum enim *Flatulentia* in eo maximè consistat, ut in Subjectis huic obnoxiiis, *plus Flatuum* à paribus materialibus occasionibus cooriatur: imò verò superior gradus huiusmodi incommodi maximè versetur in *effero Flatuum proventu*, à causis etiam *levioribus*: Manifestum hinc utique est, quòd culpa à *materia* deduci non possit, cum hæc nonnisi pro sua *quantitate*, *Flatulentæ elasticæ* quoque *expansionis* proportionatam quantitatem efficere posset: sed longè evidentiore ratione, alia penitus subesse debeat causa, quæ, ex alio planè fundamento, plus aut minus *loci* potius, quàm *materiæ*, *Flatibus* præbere possit.

§. XXIII.

Priusquam autem ad confirmandam pluribus argumentis, imò documentis hanc sententiam, porrò progrediamur, conveniet utique aliquot etiam verba proloqui de *materiali Flatuum indole*. Sunt autem *materiæ*, quæ *Flatus progignunt*,

diversæ indolis; aliquæ quidem manifestius ad *spumidam elasticam* indolem quàm maximè pronæ; aliæ verò solum ad *motum peristalticum* Intestinorum, seu potius *usum & effectum* ejus, frustrandum, habiles: aliquæ etiam ad insignem, & imprimis diuturnum, aut subinde recrudescentem, *stimulum* Intestinis velut impingendum, efficaces. Sicut autem illò sensu, de quo loqui in animo habemus, nempe *strictioris* acceptionis *materiali* causa, solæ *primi* ordinis jam dicti substantiæ, in hunc censum venire possunt; reliquæ autem utræque magis, imò potius absolutè, ad præcipuam illam *subjectivam* causandi rationem pertinent, nempe *Toni Intestinorum*, maximè verò *æqualitatis* ejus, turbationem: ita manebimus propterea, tanquam pressis vestigiis insistendo, in ipsa illa *materia* ita considerata denotatione.

§. XXIV.

Priusquam autem nominatim *materiam* hujusmodi enumeremus, nempe secundum varias res, in quibus quàm maximè hæere intelligitur, notamus meritò de illa, tanquam præliminariter, quòd illa quidem omninò hos effectus edat, in subjectis de reliquo etiam *dispositis*: interim nequaquam eorum ita simpliciter & absolutè compos existat, ut *indifferenter*, apud singula individua, toties quoties assumitur, unum eundemque specie effectum omninò edat & exequatur. Quod, cum ita se habeat, magnus, inquam, numerus hominum, ab iisdem omninò *materiis*, nonnisi diversissimè afficiantur; adeò, ut, dum alii, & maximò quidem numerò, vel planè *nihil* incommodi inde persentiscunt, unus aut alter demum, maximè verò *Fæminæ*, molestos tales eventus experiantur.

§. XXV.

Quod profectò iterum minimè ita promptè evenire posset, si directè simpliciter ab ejusmodi materiis, *halitus* illi *elastici* ita emanarent. Tantò magis, cum etiam aliæ circumstantiæ materiales in ipsis subjectis quasi magis *inherentes*, spasticarum exacerbationum concursui quàm minimum favere

videantur. Ita enim, primò omnium loco, ad *Flatulentiam* nulli magis dispositi sunt homines, quàm tales, in quorum universo corpore, tam parum apparatus *spastici* comparet, ut potius omnia ibi, ad manifestum planè sensum, ad *torporem* & *flaccidum marcorem* disposita compareant. Notissimum siquidem est, quòd nemo hominum simpliciùs atque planius ad *Flatulentiam* dispositus observetur, quàm illi, quorum corporis habitus, & temperies, ad mollitiem *Toni* præ aliis dispositus est, nempe qui sunt temperamento sic dictò *Phlegmaticò*. Cum ex adverso, qui vel *activiore* sunt temperie, vel quoquò modò crassiore atque *robustiore* textura, à *flatulentia* magis magisque sint alieniores.

§. XXVI.

Quamvis autem etiam aliorum Temperamentorum, & imprimis *Sanguinei* & *Cholerici* habitus, Subjecta, ad hos eosdem affectus devolvi possint; neque tamen hic eventus talib9 tanquam *directè*, & simpliciter ita competit, quin demùm per *violentas* quasi causas, eò devolvantur: nec sunt etiam tales *flatulentiae*, ita facile sinceræ atque simplices, quin potius ad succedentes novos graviores *connisus* citò progressum faciant, *Tormina* inquam: *Spasmos* nempe utique; sed *effectus* potius aut *eventus*, *flatuum*, quàm *directas causas* eorundem.

§. XXVII.

Quemadmodum autem hæc etiam totius Corporis *laxior* Constitutio, ad ortum *Flatulentiae* reverà quàm plurimùm contribuit, ita sunt etiam paris efficaciae aliæ notiores in hoc causandi genere, res; nominatim illæ, quæ *mucidâ* qualicunque atque *tenaci* consistentiâ, intestinis *adhærescendo* molestiam faceßunt; unde v.g. præter alia, in hujus consistentiæ intemperiem, sub insufficiente concoctione faciliùs transeuntia, *oleracea* crassioris succi, *pisces marinos* siccatos, *pisa* & *fabas*, [quanquam hæc etiam alterò modò flatus gignunt] notissima est hujus generis efficacia, à *pingvedine*, ovilla imprimis,

mis, si superbibatur *frigidus potus*. Quid, quod notissima ita utique sit efficacia nudæ insolitæ *refrigerationis*; in aliis ipsis Abdominis: in aliis etiam *Artuum*, *Manuum*, in aquam frigidam immersione, *Solearum Pedum* nudarum deambulatione super pavimento frigido, imò interdum solius etiam lecti, si corpus sub illo æqualiter caleat, vel levi quadam ventilatione, unde frigus nonnisi in parva aliqua parte corpus attingat. *Ancipitis* autem efficaciam in hoc genere sunt utique illa talia *fermentescencia*, quæ partim habituum verè *elastico-rum* copiam producunt; partim etiam *acrimoniam* veræ concipiendæ idonea sunt, quæ etiam *stimulando* negotium Intestinis faceffat & molestiam objiciat, unde quidem verè *spasticæ* quædam inæquales commotiones cooriantur: quæ tamen minimè *directè* & simpliciter, ipsæ inquam, dum fiunt aut durant, & in quo loco existunt, *Flatuum* proventui ullò modò serviunt; sed unicè *secundariò*, *mediate*, *per indirectum*, uti mox dicemus.

§. XXVIII.

Materiæ verò quæ verè *Corporali* magis atque *Physicò* æctu & effectû, ipsos Flatus velut in *substantia* proferunt, sunt utique maximè omnium, quæcunque ad *fermentescendum* promptæ, eò ipsò *elásticos* halitus efformant & suppeditant. Ubi utique primatum quasi ducere *feces* cerevisiarias, vel plebi notissimum est; unde feculentæ ultimæ cerevisiæ è dolio, æque odiosi hujus effectus compotes existunt, quàm nimium adhuc recentes, & in medio actu turbidæ fermentationis adhuc constitutæ, *jung trübe Bier*: Quid, quod etiam farinacea *triticea*, mediantibus *fecibus* cerevisiariis in spumidiorem fermentationem exagitata, in paulò sensibilibioribus, effectus hos satis imitentur: imò verò notissima propemodum sit omnibus, gemina prorsus efficacia, si *pulticulis*, tam farinaceis, quàm è milio paratis, *haustus* largiores, imprimis *frigidi*, mox superingerantur. Neque multum dispar est ratio *oleraceorum*, *raphanaceorum*, maximè omnium autem fru-

fructuum horæorum. Hæc inquam omnia, materiam ipsam flatulentam promere & suppeditare, in confesso est.

§. XXIX.

Longè tamen omninò hinc adhuc abest, quantumlibet præsentibus non solum hujusmodi *materiis*, sed omninò qualibuscunque ejusmodi *halitibus* inde procedentibus, effectus ipse actualis Flatulentia, nisi accedat altera illa *primaria* constitutio, *locum* dilatationi concedens. Inde enim familiarissima non solum, sed omninò etiam notissima, sunt hujusmodi exempla, ubi à qualibet harum rerum, neque parcè quidem, sed sanè *assatim* ingestarum, præsentia, nihil quidquam hujusmodi subsequitur, sed non aliter, quàm si quidlibet minimè suspectum assumtum esset, tranquilla omnia persistant.

§. XXX.

Dilucidat autem Indolem *energiae* ad *progignendos* Flatus, etiam illud, quòd etiam *stimulatoria* efficacia, *Flatuum* proventum inducere observetur: & quidem minimè ullò, illò ipsò tempore, verè *spastico* phœnomeno *concurrente*, sed unicè *intercedente*, imò, certò sensu, *præcedente*. Specimen hujus rei luculentissimum, exhibet maximè curiosa docimasia effectus *Venenorum*, ab Excell. Brunnero, Archiatro Elect. Palatino, jam pridem instituta, & à Celeberr. Wepffero, Socero ejus, in elegantissimo Tractatu *de Cicuta aquaticâ*, exquisitis commemorata. Ubi videlicet canis, ab ingesto *Arsenico*, in gravissimos vomitus actus, post illos *flaccescente* iterum ventriculo, mox amplissimas Ventriculi *distensiones flatulentas* incurrit; quæ tandem, denuò repetitis vomitoriis *spasticis* visceris hujus contractionibus, elisæ, & contortò vehementer Ventriculò facti conatus vomitorii, quoties ad *flacciditatem* Ventriculi remittebant, toties *inflationi* ejus spatiosæ locum ita concedebant. Quemadmodum autem ipsa utique simplicissima ratio dictat, quod ad *distensionem* flatulentam Intestinorum, omninò utique necessaria sit, tanquam inseparabiliter,

liter, *Remissio Toni* eorundem ordinarii; extra quam certò nulla secutura sit huiusmodi distensio: Ita venit insuper omnino etiam prudenter perpendenda, illa remittendi soliti *Toni* occasio, quàm D. D. Præses jam olim in *Differt. de Æstu maris Microcosm.* considerationi prudenti commendavit. Nempe, quòd susceptò alicubi, maximè omnium autem in *conjugatis* partibus, *augmento tonici* motus, in consentientibus, imò etiam sæpe numero disitis, in aliis quidem *conspiratio* ipsius augmenti *spastici* sentiatur; in aliis autem *contrà*, manifesta *remissio*, etiam ordinarii atque usitati *Toni*. Id quod non solum *particularibus* numerosissimis exemplis satis luculenter notum est, sed etiam *universalioribus*. & eminenter quidem in *augmento Pulsus Febrili*; sub quo *Tonus* totius externi corporis *langvere* videtur. Tantò magis autem certior est in hoc genere, illa *Toni remissio flaccida*, quæ post solitò fortiores *connisus* succedit, spatiis velut ad *resumendam* qualemcunque *energiam Activitatis* interpositis: quod quidem in ipsis usque etiam secundum naturam, laboriosioribus conaminibus susceptis, notissimum est.

§. XXXI.

Quando itaque *molestæ* tales res, progressui libero, qui per ordinarium motum *tonicum peristalticum* unicè agitur atque tentatur, impares, sed potius *obhærescentes* Intestinis, iisdem insunt, alibi quidem intensiorem peristalseos huius instituit, alibi verò etiam fastidiosum atque tædiosum ejusdem *torporem* admittit, ut experientiæ consonum, ita profectò rationi nusquam alienum aut conceptui considerato impeditum esse posse, nobis certè videtur. Tantò magis, cum utique etiam illa, animum vel leviter advertentibus reverà evidens, unà subsit constitutio, ut *intensioni spastica* peristalseos ordinariæ, quàm plurimum utique velificentur talia imprimis contenta, quæ non tam solum *fastidiosa molestiæ* inducendæ apta judicari possint, quàm certius *stimulo* etiam velut incutiendo paria. Unde nempe talia quidem, præcipue

puè *torminosis* spasminis producendis quam plurimùm favent: quæ verò *inertia* sunt & quasi *fatua*, simul tamen *tenacem lentorem* formantia, illa inducunt, simplicius *torpidâ* hujusmodi remissione, nudos etiam atque simplices magis *flatus*.

§. XXXII.

Apparent autem harum rerum exempla, minimùm omnium intricata aut impedita, in ipsis usque infantibus; utpote quibus non solùm in excrementis *acrioribus biliosis* in alvo latentibus, *viridibus*, *nidore* etiam *acetoso* adversis, & anum patientium *arrodentibus*, quin *lintea* ipsa tenuiora, *aquæ stygiæ* instar, *exedentibus*, ipsis usque mulieribus notum est, quantis Flatuum intra Corpus borborygmis, extrorsum autem etiam explosionibus, non minoribus, quàm apud quolibet adultos & quadratos homines, sese exerat, *torminibus*, & *elisoriiis* etiam talibus contentionibus, intercurfans *atonia* illa, quæ *distensionibus* illis, adeoque flatuum *expansionibus*, verum locum præbeat. Sicut, è diverso, etiam *lentior*, cum *vitellina* bile (vulgò dicunt *wie Eyer-gehacktes*) visibiliter concurrens *tenax* mucositas, *torminum* hujusmodi minùs infamis est: imò etiam *lento*res illi mucidi, quos infantes è tussi humida mucilaginosa, sursum propulso, deglutiendo, Ventrículo & Intestinis obtrudunt, è quibus tandem etiam sub hac ipsa consistentia iterum egeruntur, quantò quidem *tenaciores* sunt, tantò certius & uberius producant etiam ipsos *Flatus* copiosiores, non æquè verò *tormina*.

§. XXXIII.

Omnibus his ita simplicioribus circumstantiis, si etiam jungatur illa ulterior, quòd *Flatulentia* quàm maximè familiariter eveniat, oboriat inquam, & in posterum etiam insistat, à morbo aliquo *debilitatis*; tantò magis autem *fœminis*, circa ipsum abdomen jam aliquid incommodi passis, ut antè omnia *puerperis*: imò non ita paucis harum, imprimis quibus adhuc aliquid præter naturam in ipso Utero hæret, etiam *æquali*, *continua* & *diuturna* quidem, plurium mensium, di-

stensione hujusmodi flatulentâ, *insistat*: (In quo casu, sicut etiam in ipso *Tympanite*, perpetuum *æqualem Spasnum* ejusmodi, quoquô tandem modô transpiratorias exhalationes simpliciter cohibentem, concipere sine planè arbitrariis mentis fictionibus vix licuerit) *Atonia* verò talis, seu *flaccidus torpor* harum partium, etiam multis aliis argumentis æque, ac exemplis sive documentis, abundè sit veritati similis: putamus posse ex his rebus ita tam à priori, quàm à posteriori satis colligi, imò agnosci, commercium illud, quod ita omninò ipsa *Flatulentia* habet, cum *Toni* Intestinorum relaxatione, remissione inquam *flaccida* atque *torpida*.

§. XXXIV.

Ex his circumstantiis dilucescere posse confidimus, quantò major, & evidentior maximè, cenferi possit, ad producendum Flatuum proventum energia, tam *defectus motus tonici*, quàm *excessus* ejusdem, nempe qualiscunque *spasmus*; utpote cujus antipraxia adversus *dilatationem* seu distensionem, non solum in se & velut absolutè mox occurrit circumspectæ pensitationi; sed etiam dilatatio totius ambitus Intestini in tantam capacitatem, nullo præjudicio *densationis* illius, quæ fibris ita assignata, autor esse debeat *stricturæ pororum*, elasticas exhalationes aliàs emittere suppositorum, quantum nobis quidem occurrit, non minùs longè abit ab omni concipiendi facilitate.

§. XXXV.

Quantumlibet autem etiam *adventitios fermentativo-elásticos* halitus (in potentia, nempè ad *subeundam* halituosam expansionem, aptam materiam) pro *causa* satis potente *producendorum* flatuum *materiali* recipiamus; minimè tamen hòc ipsò tanquam *absolutè necessariam*, putamus, aut pariter recipimus talium rerum nudum crassum *adventum ab extra*, ab *ingestis*, inquam, *feculentis*, aut è succulentis *dulcibus fructibus*, *melle*, *leguminibus* &c. oriundis exhalationibus. Sed agnoscimus omninò, posse hujusmodi expansivas
aqueo-

aqueo-oleosas portiones, etiam perpetuò in Intestinis præsentibus materiis, tribui & adscribi. Non solum ab assumptorum diu residuis *fermentescentibus* reliquiis per Intestina obhærescentibus: sed omninò etiam modò nominatis ejusmodi *seroso-biliosis* materiis. Ubi utique neminem hominum inter patientes versatorum, ad ipsas usque mulieres patientibus famulari solitas, latet, quantum diversitatis intercedat in affectibus *torminoso-flatulentis*, 1) si æger planè non bibat, aut tantisper dum non bibit; 2) quando *calidè* bibit: 3) quando *ἀζυμὰ* seu *nihil fermentescentia* bibit: 4) si præsentius *fermentescentia* bibit: 5) si insuper *frigida*.

§. XXXVI.

Non possumus autem quin hòc ipsò locò breviter perstringamus pandemiam illam inter Neotericos condemnationem quorumlibet *dulcium*, quam imprimis sub *triplici* aut *quadruplici* imputatione complectuntur (quamvis sub explanationibus repetitis eodem propemodum, aut summum ad duos apices, recidente.) Nempe volunt *primò*, etiam jam remotiores, quòd *dulcia bilescant*, seu in *bilem* mutantur; non quamlibet, sed *acrem, causticam, æruginosam*. *Secundò*, quod *dulcia acescant*; quod sicut extra corpus humanum minimè vanum est, ita, quando etiam in corpore humano planè pari ratione supponitur, habent, quod dispiciant illi recentiorum, qui bilis indolem simpliciter, nempe, quod ajunt, essentialiter, *alcalicam* supponunt; quomodo hoc inter se concilient, ut materia in *acidum* converti prompta, eadem promptitudine etiam in *alcali* vertatur. Ubi certè tales non expediet frivola illa nominalis distinctio, seu potius stolidi transumptio tanquam in unum constans forum, variarum illarum *appellationum*, *bilis rubræ*, seu *Sanguinis*, *bilis flavæ*, *bilis vitellinæ*, *bilis æruginosæ*, *bilis isatodis*, *bilis amaræ*, *bilis acidæ*, *bilis alcalicæ*, *bilis causticæ*, *bilis viscidæ*, & tandem *bilis insipidæ & fatuæ*. Quæ nempe phantasmata, dum a sininò labore, quod sciens dico Præses, in odiosis suis

otius, in locos verè *communes*, & meritò *Canalicolis* publicandos, tanquam è cloacis publicis comportant, loco *historicæ* observationis, quod, & ubi, ita varia, & imprimis dissona, enarrentur, hæc omnia & *singula* tanquam oracula, ex nuda allegatione, *credenda* atque *verenda* posthac tanquam rem judicatam simpliciter allegare, omni exceptione majus testimonium haberi volunt, imò à quo etiam nulli provocationi esset locus, & quidem inter homines non solum, sed etiam rationales.

§. XXXVII.

Nempè longè certè non solum doctius & peritiùs, sed etiam prudentius sine dubio, agerent quilibet, qui de his rebus, si modò fieri possit, seriò loqui in animum inducunt, si non è cerebrinis generalissimis opinionibus, sed è veritate ipsâ factorum, de indole *dulcium* agere cordi haberent: eoque ipsò etiam ab *Experientiæ* suffragio intelligerent, quæ dulcia, qualibus ita crassò modò decantatis alterationibus verè idonea existant: aut si hæc non intelligunt, eâ prudentiâ uterentur, ut de rebus ignotis mallent non solum in genere tacere, sed tantò magis in specie alios docere velle. Ubi nempe, cum utique directum nostrum propositum nequaquam ferat: hisce talibus, rebus tempus impendere, sufficere poterit breviter monuisse, quòd utique ingens subsit differentia, inter dulcia *in toto genere*, quælibet inquam concreta, talem saporem offerentia, adeoque dulcia *quæ talia*; & alio peculiari concurrente effectû in super potita. In cujus distinctionis fidem non opus est ullas argutias texere, sed nudam diversitatem *Sachari*, imprimis *solidioris*, atque *mellis*, allegasse. Quæ eò usque certè sufficere potest, ut qui hoc nesciat, è hominum censu expungendus sit. Sicut enim etiam alioquin, in reliquo inquam *fermentationis* actu æque ac effectû, nisi quidem prorsus imperitis, nemini ignotum esse potest, quanta intersit diversitas inter *Sacchari* atque *Mellis*, tam *impetum* fermentandi, quàm proventum *acrimonie* & *acoris*, non solum citio-

rem,

rem, sed quàm maximè etiam *fortiorem*: ita *spumofitas* etiam *elastica* quàm diversò modo sese sistat in *Saccharatis*, & contrà *Mellitis*, etiam nudis quotidianis experimentis, nemini usquam notius est quam ipsi quoque plebi: quæ proinde meritò utique circumspectè cavet, usu scilicet ipsò edocta, ne *Mellis* esui temerè superbibat. Quod de *Saccharatorum* usu, non in dies, sed etiam in horas, contrariò modò se sistere, utique hodiè toti Germaniæ notum est, in familiarissimo illo, non usu magis, quàm revera per omnes angulos quasi etiam intemperante abusu, tùm aliarum formularum *Saccharatarum*, cum *farinaceis* etiam *fermentescentibus* combinatis, tùm potus *Thée* & *Coffée*, communissimè cum multo *Saccharo* distemperati. Sicuti reverà etiam inanes ineptorum *Speculatorum* curas, securè rident citeriores *Pomerani*, quorum nempè vel paulò lautioribus, neque *Vini* neque *Cerevisiæ* haustus placet, nisi *Saccharò* ad dulcedinem non superficialembutur &c. Sicut etiam adversus hominum solò nomine *Praxin Medicam* præ se ferentium, otiosas, & passim etiam meritò sublestæ fidei, observationes, de malo effectû, adeoque cavendo usu, *Saccharatorum* dulcium, facile comparari potest, imò verò debet, verè *Practica Medica* notoria illa observatio, quod antè nugamenta illa, & adhuc passim, in omnibus partibus Europæ, præscriptiones *Syruporum* in variis *Electuariorum*, *Linctuum*, *Fuleporum*, *Morsu-
lorum* &c. formulis, ab aliquot centum annis etiam illimitato, à proximo autem adhuc dimidio Seculo etiam liberali ad minimum, usu, nihil usquam [exceptis singularibus planè casibus & personis, si ἡ πολὺς Φαντασία absit, revera rarioribus] minùs felicem cujusvis generis patientium reddiderit curationem.

§. XXXVIII.

Ne verò alienam fortè hanc animadversionem inseruisse cuiquam videamur, tuebitur nos certè efficacia hujusmodi dulcium, quæ vel ex se, vel inconditò usu, veram *Flatuum*

genesin præstant, è fructibus succulentis *horæis* mollibus, & ipso imprimis *Melle*. Ubi tamen iterum minimè absolutè & simpliciter ita sese gerunt hæc concreta, ad producendos *immediatè* Flatus; sed testantibus potiùs omnibus circumstantiis priùs producunt *acrimoniam*, Intestinis unò locò *stimulandis* aptam, à quo stimulo, uno loco contractio, alterò locò *flaccida* talis velut enervatio, aut certè *torpida remissio* admissa, *distensionis* flatulentæ, ab *elasticis* illis sub tali *fermentatione* emergentibus halitibus, locum præbet.

§. XXXIX.

Quemadmodum autem hujus generis flatulenta energia, non simplicem, sed compositam jam indolem producit, nempe cum *torminosis* contentionibus concurrentibus conjunctam; ita est etiam, nisi quidem nos omnia fallunt, hujusmodi ipsius Eventus minimè impedita aut ullò modò difficilis ratio, quomodo, *reciprocè* à contentione in una parte, *torpor* in altera, & hanc insequens *distensio*: à *distensione* verò majore, aut imprimis ampliore, etiam *nova* tonica contentio, pro partis distentæ *restitutione* in naturalem suam *coarctationem*, sequi, & ita veram indolem *irritationis* exprimere possit; si non simpliciter *physico-mechanicè*, per *acumina* stimulorum fodicantis, tamen *physico-moraliter*, debiti toni vigorem denuò quasi provocantis.

§. XL.

Sunt autem reverà Flatus copiosè atque promptè cooriri advescentes, huic etiam *torminosæ* contentioni *succedenti* ita familiariter velut obnoxii, ut, ne hic etiam alius quàm rei veritati consonus conceptus locum inveniat, meritò servanda sit distinctio illa, quæ passim rectè attendentibus occurrit. Ita enim maximè utique omnium ad *torminosas* contentiones referendi sunt illi flatus, qui rebus rectè æstimatis ortum suum trahunt ab illa *alibi facta* stricture fortiore atque contentente, provocata ab acriore aliquo *stimulo*. Secundò, quæ à *lentore* tenaci, ipsum *finem motus Intestinorum* debiti frustran-

strante, originem trahunt; Fluctuante nempe inter fortiores spasticas stricturas, & interpositas, tanquam interquiescendi, post laboriosum motum, scopo, ejusmodi *flaccidas* remissiones, distensionem obsequentes.

§. XLI.

Tertia autem turba, originem suam debens simpliciore, tanquam langvido, aut *fastidioso torpori*, & ut vulgò loquuntur, *debilitati* Intestinorum, nec ipsa etiam minoris, sed revera potius, lenior, majoris frequentiae, producit Flatus citrà peculiarem aliquam *torminosam* consecutionem; & quidem quàm maximè faciliùs etiam *sùrsùm* aut *deorsum* *progredientes*; placidâ nempe reliqui *toni peristaltici* prosecutione. Aut, si etiam apud aliquos diutius persistant, & Abdomen ita distendant, tamen nulla sequatur commotio ferocior *spastica*. Unde quidem familiaris hæc est constitutio, in subjectis tùm aliàs torpidioris habitus, tùm etiam ad *refrigerationis* sensum delicatioribus, ut ab externa moderata, sed tamen præter ipsorum consuetudinem, *refrigeratione*; aut *genuum*, *pedum*, imprimis *solearum* seu calcaneorum, refrigerio, reliquò corpore æqualiter calente, mox Intestina flatibus impleantur: daß ihnen der Leib geschwind voller Blehungen komt/und lange also dohnet. Sæpè quidem cum *volutationis* seu progressus de uno loco in alium, sensu, & tandem etiam actuali *eruptione*: aliquando tamen etiam cum satis diuturna quasi *contentâ detentione*, nihilo tamen fecius sine *acerbioribus spasticis* conatibus.

§. XLII.

Certius tamen propemodum est etiam illud, quòd quantumcunque *tacita* & *insensilis* per initia, flatulentia, quantò magis adfuescit, imprimis autem negligentius tractata, & nullâ habitâ curâ vitandarum occasionum, etiam sensim magis *insolescens*, magis magisque inclinatur ad *torminosas* etiam contentiones. Quod quidem tantò certius expectandum venit, si hujusmodi constitutioni jungatur *Alvi siccitas*, per desidiam, aut *assumptorum* spissiorum atque sicciorum culpam. Siquidem diutinæ durio-

duriorum scybalorum detentioni, omninò utique quadrat superveniens tandem acrior *nifus tonicus*, & cum hoc deinde *alternans flaccida* illa remissio, huic succedens *flatulentia*: imò verò, in præsentis notationis constitutione, etiam aliunde coorta, flatulenta *distensio*, quæ, dum per *obstipationem* illam progressum nullum assequitur, sensim sensimque majori contentioni occasionem ita præbet.

§. XLIII.

Quemadmodum autem cum flatulentiâ, quoquò modò non satis liberè progrediente, acriores *contentiones tonico-spasticae* satis promptè confortium ineunt; ita est certè peculiari censurâ notanda, energiâ hujusmodi minimè contemnenda, quin etiam usu ipsò familiariore tantò justius cavenda, flatuum insolescentium *voluntaria retentio* atque cohibitio. Talis enim si suscipiatur in corpore magis sanguineo, quantumcunque plethorico, imprimis autem jam alias ad *spasticas* hujusmodi contentiones præpendente, prognascuntur inde promptissimè insignes, imò aliquando etiam pertinacissimæ æque atque vehementissimæ *torminosæ spasticae*, imò *convulsivæ*, malæ consecutiones. Quæ profectò nequaquam rarioribus exemplis, sæpenumerò deludunt speculabundos causarū inquirentes, ut tam *flatuum* manifestò comprehensorum, quàm *torminum* etiam talium vehementium, imò *convulsivarum contentionum*, ortum, 'prolixa Philosophia, ab *acutissimis* cacuminibus salium *scorbuticorum* commotorum, & *dyscrasiâ* incredibili totius Massæ sanguinæ, arcessant, eique paris opinionis medicamenta, varia atque multa, & ipsa usquè *Opiata*, destinant priùs, quam ullus ad *alvum* expediendam, & flatus *deorsum* revocandos, conceptus in mentem venerit: qui tamen si rectè in effectum deducatur, revera sine aliis ambagibus, si mature fiat, etiam toti, sin etiam seciùs, tamen præcipuo, malo subigendo sufficere potest,

§. XLIV.

Quod autem huc usque de genesi atque proventu *Flatuum*

tuum diximus, uti circa hanc materiam sufficere posse putamus pro *Ætiologia Ortus* illorum: Ita quod concernit *Flatulentia*, seu *promptitudinis* atque *multitudinis* ad Flatus concipiendos, ingenium, est utique circa hanc notanda *duplex* occasio, quæ huic effectui omninò par existit. Est autem *primò*, insignis *simul & semel* introducta hujusmodi flatulenta *atonie*, quæ deinde facillimè ita adhæret patienti, ut etiam per *leves* satis causas non sollicitè planè evitatas, continuatio, hujusmodi semel ita suscepti ingentis incommodi, facile perennet. *Secundò*, prognatæ etiam à sæpiùs *repetitis*, & nullâ cautione evitatis, causis, ad inducendam hanc atoniam idoneis, flatuum frequentia habitus denique inducatur. Quæ quidem ratione, non solum in levissimo, sed etiam quasi nullo fere flatulentia initio, flatuum solum, tanquam adhuc singularium, nimium libera, imò vel prorsus aliquando immodestè *affectata*, *emissio*, seu potius *explosio*, præbet omninò non rarissimè originem hujusmodi *adsuetudini*, ut in posterum quàm maximè nolentibus, flatus non solum facillè cooriantur, sed etiam magis magisque insolente atque pervicaci insistendi & velut urgendi pertinacia, sicubi fortè interdum liberæ exclusionis occasio deficiat, non sine variis gravioribus incommodis & ferocioris *pertinaciæ*, imò verò *spasticorum* successuum, periculis, qualicunque vi imposterum reprimantur.

§. XLV.

Est autem omninò adhuc unum verbum dicendum, de flatuum quadam circumstantia, quæ revera etiam non parum detrahit aliis opinionibus de proventu illorum. Est verò hæc, quòd Flatus *pauciores* atque *mitiores*, etiam sæpenumero re ipsa iterum desinant & velut *evanescant*, citrà ullam actualis *excretionis* necessitatem. Non quòd, secundum aliquorum hominum præfigurationes, flatus, ut simpliciter & absolutè *elastici*, & *incoercibilis* genii, sub *aërea* hujusmodi consistentia, sive in *contenta* Intestinatorum rursus velut imprimantur, aut prorsus in ipsum *Sanguinem*, sub hac inquam sui consis-

sistentia *elastica*, distributi, cum hoc per habitum Corporis passim ita distribuuntur, ut non solum, secundum aliquos, *arthritodeum* affectuum architecti evadant, sed etiam, juxta plebejos aliquos, tanquam *visibiliter*, in vasis cum Sangvine oberrent, unde horum dicterium, es lauffe ihnen in den Udern wie Quecksilber. Sed quod reverà, etiam conceptà temporarià *elasticitate*, *aqueæ* etiam *tenuis vaporescentes* portiones, sensim iterum densentur, & in corpus arctius *fluidum* coalescant, adeoque revera iterum *subsidente* distensionis energiâ, *tonus* suus Intestinis placidè restitutus & æqualiter continuans, hoc ipsum incommodum rectè expediat. Valet autem hujusmodi spontanea *subsidentia* non æque alibi, quàm in admodum adhuc *mitibus* flatulentiae initiis; deinde in flatibus magis adhuc per *superiora* Intestina oberrantibus: imprimis autem *tertio*, simplici sensui *refrigerationis externæ* succedentibus. De *obfirmatâ* jam magis *adsuetudine* verò, non solum promptæ atque magnæ *atoniae*, sed *adsvetorum* etiam liberiorum promotionum & *emissionum*, ancipitis prorsus eventus est hujusmodi retentio atque *repressio*, imprimis in *Colo* jam Intestino detentorum hujusmodi flatuum, & magna cum contentione superioris & inferioris portionis *spasticâ*, pressorum: neglecto imprimis etiam externæ *concoctationis* subsidio: utpote quò casu omninò facilè periculosa *antipraxes* intensiois & remissionis *tonicæ*, & tam antiquæ contentiois, quàm novæ *distensionis*, expectandæ veniunt.

§. XLVI.

Quemadmodum autem *Flatulentia*, etiam nudâ *adsuetudine* ita introduci potest, ita sunt etiam certi circa *Abdomen*, & imprimis Intestina, Affectus, qui *flatulentiam* partim post sese trahunt, partim *fovent*, & omninò eidem favent. Sunt autem hujusmodi, ante omnia, & velut in genere, qualescunque *hysterico-hypochondriacæ* contentiones, in feminino, & *hypochondriaco-hæmorrhoidales* apparatus *tonico-spastici*, in
utro-

utroque, imprimis tamen masculino, sexu. Unde non solum revera omnes *hystericæ*, sed etiam omnes *hæmorrhoidarii*, infallibiliter sunt *flatulenti*. Nempe non aliunde magis, quam ab ipsa *vagâ* illa, *toni*, tam per *Intestina*, quam per *Mesenterium*, variatione, quæ ad *directionem* Sanguinis ad & per peculiariora loca hujus regionis, respectat.

§. XLVII.

Sicut autem minimè citrà, nedum contrà, quotidianæ Experimentiæ suffragium, diximus, quòd *Flatulentia* aliquando etiam cooriatur tanquam *repentinò* proventu, ab importunioribus causis simul & semel ægros invadentibus, & graviùs exercentibus; unde nempè deinde *atonia* illa, quasi simul & semel cum impetu introducta, perennet: ita est tamen etiam aliqua peculiaris animadversio necessaria, circà *phenomenon* illud, quod omninò vel solum idoneum esse potest ad com-
monstrandam insignem diversitatem inter *Flatulentiam*, & *spasticos* *Intestinorum* *Affectus*, *torminosos*. Versatur autem in eo, quòd homines qui *Dysenteria* gravi, & præcipuè plus simplici vice, exerciti fuerunt, tam alienos imposterum à flatuum proventu sese gerant, ut inde non infrequens sit ab illis audire illam loquendi formulam, *durata* sibi esse à *Dysenteria* *Intestina*, ut non facilè à quibuscunque rebus, quæ aliàs *flatus* cum *torminibus* inducere consueverunt, ampliùs incommodè afficiantur. Manifestiore videlicet inde energià verè *activæ* intensiõis motuum *tonicorum* atque *spasticorum*, sub jugibus velut illis *excernendi* & *exprimendi* conatibus, adversus *atoniam*, tanquam verum directum fundamentum admittendæ *distensionis* flatulentæ. Secus tamen evenit utique illis, qui in quibuscunque *torminosis* *Affectibus*, *refrigerationibus* internis & externis perperam sibi prospicientes, imò vel subsidiis necessariis formentorū neglectis, occasionem ita præbent, ut importuniori *spasticæ exacerbationi toni* *Intestinorum*, utique illa ipsa *atonia* deinde vestigia legat, quæ o-

mnibus gravioribus contentionibus *tonicis*, tanquam *alter-
nando*, succedere sivevit.

§ XLVIII.

Quantum autem utique ad admittendam, imò fovendam
atque sustentandam, flatulentiam, valeat energiae *tonicae remis-
sio*, non potest aliunde luculentius dilucescere, quam è *puer-
perarum*, imò *Abortum* passarum, exemplo; imprimis autem
si multis nothis doloribus post partum, (vulgò *Nachwehen*)
exercitæ fuerint. Quando enim tales, præsertim *colligatio-
nem* debitam strictiorem Abdominis insuper habent, nimium
etiam, & imprimis frigidius quàm expediat, bibunt, incurrunt
inde familiariter stabilem *distensionem* & *inflationem* Abdo-
minis, à prægressa utique *gestatione* foetus diuturniore, velut
enervati: quantumlibet etiam ex *Abortu*, reverà adhuc satis
parvi foetus aut conceptus, & conjuncta etiam adhuc minùs
spatiosa Abdominis distensione, coorta ita qualiscunque ejus
flatulenta distensio, augescere sensim observetur, & increbe-
scente *atonia*, ipsa etiam distensio magis expandi.

§ XLIX.

Quemadmodum autem hæc omnia quæ huc usque in
medium protulimus, unà cum ipsa sana ratione, simplici pe-
nitùs & nihil coactâ, utique testari possunt, quòd *primariae
causa* proventus *flatuum*, tam *simplicis*, quàm *insolentis*,
seu *flatulentiae*, maximè sit *relaxatio toni* ordinarii atque de-
biti partium continentium; qualem semel factam, utique fa-
cilè ad distensionis effectum perducunt, tum ordinaria ab sube-
undam halituosam expansionem idonea contenta fermente-
scents indolis, tum adventitia extrà ordinem, & tantò ube-
rius, expansioni elasticæ obsequentia: ita superest, ut de ho-
rum ipsorum effectuum, flatuum inquam, ulterioribus effe-
ctibus seu consecutionibus quoque aliqua proferamus. De
SYMPTOMATIBUS inquam *flatulentiae*, imprimis magis vel-
uti directis & ordinariis; tum etiam quibusdam indirectis, &
extraordinariis quidem, sed tamen non infrequentibus, eòq;
ipso

ipsò non rerò imponentibus minùs circumspectæ Theoriæ, ut pro simpliciùs *reciprocis*, *effectibus* potiùs quàm *eventibus*, habeantur.

§. L.

Possumus certè pro effectù flatulentix etiam allegare ipsam *distensionem*; ne tamen cuiquam nimis argutè insistere videamur distinctionibus causalibus, nihil contendemus cum illis, qui distensionem talem, pro ipsa potiùs flatulentia, nempe Medico-Diagnosticò sensu, sumere, satis habere voluerint. Proximus autem gradus, seu potiùs successus, distensionis, est utique verum demum consequens, effectus, imò si mavis, & certò quidem ex parte, *eventus*, flatulentix hujus distensionis. Est autem duplex; nempe vel status, seu veluti *stasis*: vel *progressus*. Hic iterum duplex, vel *placidus* & tranquillus, vel importunior, imò aliquando vehemens.

§. LI.

Status, seu *subsistentia* flatuum, iterum, vel respectat & inclinatur adhuc ad *successum*; vel deficiente penitus hòc ipsò, fervat perpetuum, quem semel occupavit, locum. Hic posterior status, cum propriè & maximè ita opponatur reliquis discriminibus, propterea aliquod dicendum de illo venit. Est nempe Affectus hujusmodi flatulentus simpliciter statarius, *Tympanites* in utroque sexu; & in foeminino seorsim, stabilis illa *inflatio* etiam totiùs Abdominis, quæ quàm maximè post *Abortus* aut *Puerperia* minùs diligenter observata, aliquando tamen etiam nihil adhuc horum expertis, sed *Mensium* incommodis, & variis *Medicationum* tentaminibus potitis, imò etiam nimiùm *frigido potui* indulgentibus, quin *verminosis*, evenire solet. His omnibus *distenditur* non solum, sed *manet* etiam distentus, Venter: adeò quidem, ut insigniter, nedum univèrsim, *subsidere*, non sentiatur: faciliùs autem cognoscatur *augescere*, & hoc ipsum quidem etiam ipsà illà modò dicta *statariâ* atque contumaci ratione.

§. LII.

Quod autem non solum meritò, sed profectò simpliciter necessariò, notari meretur, & verum, unicum, solidum & inconcussum fundamentum totius *realis Pathologiae* suffulcit, est etiam in hoc Affectu, verò inquam *Tympanite*, ingens, & sanè certa penitus, *Infrequentia*. Quamvis enim neminem latere possit, quòd inflati hujusmodi Ventres inter foeminas, nihil æque rarissimum existant; (nisi quod tamen etiam tales, ad alias, tam *puerperia*, quàm planè *abortus*, expertas, modò rectè gubernatas, comparando, nihilominus profectò ingens etiam ita emergat *Infrequentia*, adeò ut vix *millesimæ* puerperæ hujusmodi eventus obtingat.) Est tamen utique verus *Tympanites*, in ipsis utique *Viris*, adeò insolitus, ut vix è multis millibus tandem uni evenire sentiat. Ingente certè, & planè quidem peculiari, documento, quanta intercedat differentia, inter promptitudinem œconomiae vitalis ad *conservandum*, imò pro circumstantiarum ratione exigente, etiam proportionatè *intendendum*, tonum partium vitalium, quàm eundem vel simpliciter *negligendum*, vel ut sibi eripiat, & ab aliis prædominantibus energiis adventitiis subjagetur, tolerandum.

§. LIII.

Sicut autem hòc ipsò, ex hoc ita tanquam *privativo* exemplo, satis elucescere potest; quòd inquam Natura non æq; promptè obsequatur prædominio energiæ quarumcunque, propriæ suæ *tonicæ* Energiae, tanquam positivè vim inferre machinantium, nisi ipsa potius ex suo latere, & tanquam ipsâ suâ spontè, tonum suum *destituere* susceperit: ita demonstrat hoc idem tantò magis *positivè*, ipsa illa ejusdem *Activitas*, quâ flatulentas *distensiones*, qualicunque suæ, ipsius inquam *tonicæ* energiae, negligentiae aut remissioni velut insultantes, *activè* iterum subigere atq; propulsare aggreditur. Quod nempe facit, cum simpliciore *propulsione* & *expulsione*, aliter minùs coërcibilium flatuum: tum acerrimis etiam subindè circà illos

con-

contentionibus tonico-spasticis. Quæ nempe res, obortis ut-
cunque flatibus, adeò oppositâ ratione sese habet ad antè no-
minatam illam *tolerantiam* nudam, tanquam regnantium ita
liberè, flatuum, ut, sicut illa, quoquò intuitu, tanquam verè
mirificè *rara* existit; ita è contrario, tam tempestitiva *propulsio*
flatuum, quàm contumax etiam circa illos *contentio*, inter fla-
tulentos *familiarissima* sit, & sanè ita penitus frequentissima,
ut etiam in comparatione ad illos, quibus coorientes hi flatus
etiam actu iterum tanquam tacitè *subsident*, longè potior nu-
merus notoriè occurrat, qui sive *propulsorii*, sive *contentio-*
sis ejusmodi *energiis spasticis*, adversus insolescentes flatus
insurgant, quàm iterum simpliciter *subsidentium* eorundem
obsequium experiantur. Ubi tamen iterum memor erit Le-
ctor, quòd non simpliciter de *flatibus*, qui familiarius etiam
iterum *subsident*, sed de *Flatulentia*, sermonem hìc ha-
beamus.

§. LIV.

Nempe secunda utique *conditio flatuum*, est, ut de
uno loco in alium *promoveantur*. Melliore successu, nempe
in ipsis Intestinis oborti, *deorsum*, ad ipsum usque è corpo-
re *exitum*: aut *sursum* etiam, *ructuum* exemplò, imprimis
quando in ipso *Ventriculo* residet *atonia*. Liberiùs etiam pro-
volvi, tantò melius utique est, quantò enim impeditius succe-
dunt, eò certius formant etiam hujus classis secundum sub-
sellium, de quo statim. Incommodum, quod hunc etiam
liberum *progressum* flatuum comitatur, iterum duplex est;
unum, quod contrà receptos mores impingere videatur, li-
bera *emissio* [quanquam certè, non ex simplici intemperantia,
sed reverà è molesta morbida *adsuetudine* sic adfectis, moro-
sè succensere etiam iniquum sit.] alterum, quod indulgen-
do etiam, sine modesto *moderamine*, facili & multiplici pro-
pulsioni & expulsioni tali, magis magisque insolescat *adsuetu-*
do, & non solum magis magisque sed omninò tantò prom-
ptius, in *habitum* deducatur, incipiens ejusmodi *Flatu-*
lentia.

§. LV, Cer-

§. LV.

Certè verò, uti jam plus semel monitum est, inconsiderata etiam pertinax *detentio* urgentium quàm maximè flatuum, *adsue torum* inquam, imò ad liberrimum progressum adsuefactorum, est propemodum simplicissima occasio, ad *symptoma indirectum*, sed satis tamen promptum & proclive, provocandum, nempe *conatus* & *contentiones tortiles*, ad comprimendos, aut elidendos flatus. Formatur ita *Colica flatulenta*, imò aliquando ad *convulsivas* usque vibrationes, & *syncofes* concursum, exasperanda: sicuti laboriosa & contentiosa propulsatio, etiam cum successu sursum deorsum intercurfante, *Cholerae siccae* nomine nota est.

§. LVI.

Pertinet ad hunc ipsum censum, Affectus ex hoc ordine *symptomático* non exiguae molestiae, imò periculosaë aliquando contumaciaë, quem *Anadromen*, seu Excursum *ad superiora*, flatuum, nominare convenit. Luculentissimum huius rei exemplar commemini D. Præses, Viro à multis jam annis, sub perpetuo quasi *nimio fluxu hæmorrhoidum*, & variis *artificiis*, confuso, indomitæ flatulentiaë exposito. Hic cùm aliquando *Vomitum*, cujus vix aliàs meminerat insultum, incurrisset, cum summa ferocia atque pertinacia tumultuantem, sedato iterùm hoc ipsò, hoc tamen postea ingens incommodum incurrit, ut per quatuor Mensium spatium, immanis & insolentissimus proventus & progressus *ad superiora*, flatuum ipsum exagitaret; ut varia inde gravissima incommoda, imprimis *cardialgica*, *vertiginosa*, *apoplexiæ* ipsius metum objicientia, incurrit: nullo interim unquam, per universum hoc temporis spatium, flatu, solitum ad *inferiora* progressum & exitum, ne sequente quidem, nedum quærente. Non autem adeo eximiè rara sunt huius generis exempla in sceminis, quibus *hypocondriaco-hysterico-cardialgicis* pathematibus, imò horum *exacerbationibus* à flatuum *suppressione*, malè affectis, *Vomitoria* obtrusa sunt.

In

In quibus fursum deinde tendens flatuum pervicacia, non in-
usitatas illas *heteroclitas* Tragoedias instruit, quæ vel aliis spe-
cialibus phantasmatibus, vel generaliori malitiæ. *Salium scor-*
buticorum, & longè aliorum malignorum *vaporum*, deinde
imputantur, & alienissimis tentaminibus magis perturbatæ,
non modò non in melius, sed etiam in deterius, conver-
tuntur.

§. LVII.

Eximia verò profectò consideratione omninò digna est,
hæc Flatulentia constitutio; utpote quæ perpetuò prope-
modum, minimè solam & sinceram ita hanc *ἀναδρονήν* live
ad superiora connisum, Flatuum comprehendit; sed vix non
inseparabilem habet comitem etiam *contentionem* talem *con-*
tumacem, imò subinde pervicacissimam, tanquam in medio
itinere, cum sensatione modò *torminum* exquisitissimorum,
modò sensibilissimæ & rupturam quasi minitantis, *tensionis*
Colico-iliacæ. Quæ ipsa contentio talis, satis familiariter sese
etiam exerit, in ipso ita affectorum *Stomacho*; cum *respiratio-*
nis maximà coarctatione, *angustiis* anxiis, *vertigine* ad *Sco-*
tomian usque increbescente, *tinnitu* & *strepitu* aurium tan-
quam formidabili concursante: donæc tandem erumpentes
ita *fursum* flatus tales, statim sensibile levamen subministrant.
Ex adverso verò, notissimi sunt mihi Præsidi varii hujusmo-
di casus, ubi ex opinionum multiplici varietate, Affectuum
hujusmodi miræ rationes confictæ in medium prolatae sunt,
& illis superstructæ nihilo minus mirabiles & rationes & for-
mulæ; non solùm sine reliquo effectu, sed quàm maximè
etiam extrà ipsam rei veritatem, dum vel modica adhibita per-
quirendi curâ, satis maturè comparebat, quod *flatus* ita *de-*
tenti, & *spasticè contenti*, neque legitimam ac usitatam semi-
tam, ad *inferiora*, sed potius ad *superiora*, affectare coacti, sub-
essent; qui aliis simplicioribus adminiculis, ad liberio rem
progressum deducti, longè promptius & nimio manifestius,

totam difficultatem expediebant, nempe impetum utique violentiæ, per *evocationem* flatuum mitigabant.

§. LVIII.

Ne verò justò diutius insistamus huic *Ætiologiæ* verè simplicis veritatis, pergimus potius ad illam *historico-ætiologicam* considerationem, quæ prudenti *Prognosi* omninò fundamentum præbet. Est nempè certè *Flatulentia* ejusmodi Affectus, qui, cùm *consuetudini* innitatur, minimè sive simplici materiæ *proportioni*, sive simplici uniformi & univoco effectui, quibuscunque *corporalibus* causis verè & simpliciter proportionato, innititur aut insistit; & proinde etiam *tollendi* sui spem, per nudam directam exhibitionem Medicamentorum; sive *causæ* illi suppositæ, sive *corporali* ejus efficaciam parem, nusquam admittit. Dum videlicet *adsuetudines* non solum *physicam proportionem* corporearum causarum variè & quamplurimum, excedunt: sed etiam *constantem* aliquam, & uti vulgò loquuntur, tanquam *radicalem* curam, antè omnia præsentaneam per *directa corporea* subsidia, minimè admittunt: sed gratum certè habere necesse est, si solum sensim magis magisque mitescendo, non tantum *præsentes* impetus remittant, sed etiam *recurrendi* nimiam promptitudinem sensim deponant: Ante omnia verò *perversam* illam ad *aliena loca* directionem, fatis maturè mutant.

§. LIX.

Quantumlibet autem ita non sine aliqua prolixitate veram causam & indolem Flatulentiæ demonstravimus; & ad simpliciores *duos* fontes, partialem *atoniam*, & ejus successivam *adsuetudinem*, reduximus; ita versatur sanè etiam *THERAPIA* ejus in non ita multis sive *intentionibus*, sive *inventionibus*. Antè omnia verò considerandum maximoperè venit, an Flatulentia, tanquàm simplicius & magis directè, in ipsis *Intestinis* sedem suam habeat: an verò *consensuali* quâdam ratione oborietur: quod imprimis à *puerperiorum* & *abortuum* vitio-

vitiosis reliquiis, fatis sæpè evenit: Neque minùs *hysterico-hypochondriaco-hæmorrhoo-nephriticis*, *longinquis* destinationibus atque moliminibus, familiarissimè accedit. Quibus nempe posterioribus casibus, frustrà penitus auxilium *consensuali* tali flatulentia destinationatur, *directum* atque solidum, nisi magis *primarii* illi Affectus, imò verò *conatus* atque *longinquæ destinationes* aliarum illarum *tonico-motoriarum destinationum auferantur*.

§. LX.

Quod autem quasi simplicius, magis *directæ* Flatulentia, & quidem ipsius etiam adhuc magis *simplicis*, nihil *torminosæ*, aut parùm sanè, Medicationem concernit, sunt circa illam observandæ conditiones sequentes. 1) Ut omninò *occasions*, efficaciores & importuniores, ad provocandos flatus, ab hujusmodi subjectis prudenter evitentur; Cavendo tamen etiam, nisi in constitutione præter modum efferata, ne etiam nimium meticulosa atque scrupulosa continentie, inconveniens illud, certè non insolitum, admittatur, ut extrà ordinem *nimia sensibilitas* & impatientia in Intestinis, ita inducatur & veluti concilietur: quæ deinde etiam è levioribus incitamenti in graviora pathemata exstimuletur, ut etiam vix effatu dignis occasionibus, ingens ita perturbatio promptè cooriatur. 2) Ut Abdomen, imprimis *in paroxysmis*, quantum potest Naturæ simillimò *calore* quàm diligentissimè foveatur. In *paroxysmis* inquam; quamlibet enim omninò extrà paroxysmos etiam nullatenus inutilis sit hic calor, dispiendum tamen prudentissimè est, ne etiam hic incommodum illud *advescentis* nimia sensibilitatis producat. Quod vel propterea notandum est, quod exemplis minimè gentium rarè, etiam tanquam ex improvviso, & quod ajunt, gratis, per ejusmodi quasi superfluam curam Pectori & Abdomini adversus frigora prospiciendi, per scuta quasi illa usitata, lanâ aut bombace farcta, *Brust-Läge*/ etiam præter necessitatem insolita talis *sensibilitas* facillè conciliatur, ut postea sine variis, im-

primis tamen flatulentis, incommodis, iterum deponere talia subsidia non sit integrum. 3) Ut *successus alvi* debitus nusquam negligatur; cavendo tamen etiam à promiscuo usu *stimulantium* æque, atque sic dictorum *flatulentorum*, *Mannæ*, *Cassie*, *Sennæ*; non quidem quòd talia *simpliciter ex se*, nedum *ex signatura folliculorum*, flatus positivè inferant; sed quòd tale quid tunc maximè præstent, quando sine circumspeditione regiminis *refrigerationes* arcentis, sine discrimine usurpantur. 4) Ut multum hìc tribuatur, maximè omnium non rectè respondente alvò, *Clysmatibus*; tam *lenientibus*, quàm etiam moderatè ad inferiora *provocantibus*. 5) Ut prudentissimè judicentur remedia vulgò dicta *Carminativa*, an non alium quendam *beteroclitum* effectum, unà, imò vel potentiùs, provocare valeant. Ubi certè locum habet consideratio *triplicis* energiæ *Carminativæ* dictæ; una enim innititur simplici *opinionì* & hypothesi, quòd causa flatuum vel simpliciter *frigida*, nempe *pituitosa*, *tenax*, atque *lenta* existat, cui proinde *calida* debeantur, qualia recentiores Chymiastri in *oleis destillatis* inveniunt: aut agnitæ quidem *atonix*, sed à simplici *debilitate* temerè deductæ, *acriora* & *calidiora* talia, *nervinæ* efficacix nomine, destinantur. Altera plus ad *Symptoma*, flatuum respectu, collineat; nempe *torminosos* affectus; quos si immoderatiùs *sopire* aggrediatur, Flatulentæ *atonix*, nisi quidem præjudiciù obijcit, certè ingens subsidium nequaquam affert. Tertiì verò ordinis, *vera* & potentia adversus flatulentiam remedia, sunt partim quæ *materias* flatuum procatacrticas contemperant; partim harum æque, ac ipsorum flatuum, *excretionì* placidæ subveniunt: partim denique sinceriores *tonum* Intestinis conciliant & restitunt. Quæ quidem *temperatiora* imprimis sunt, & magis in *nativâ* sua constitutione, quàm varia *separatione* aut *præparatione* exhibenda; nisi in casibus *singularibus* magis, & imprimis constitutionis patientium admodum *Phlegmaticæ* dictæ, & ibi quoque *peritâ* exhibitionis moderatione. Id quod de se-

minibus Europæis fragrantibus, reverà quàm plurimùm valet. 6) Ut dextrè ordinetur Medicamentorum *usus*, tam ad *præservationem*, quàm præsentiozem *curationem*, imò ipsam tandem *continuationem* & quasi confirmationem semel ita susceptæ, in *paroxysmis*, curationis. Quamvis huic scopo adaptari utique debeant, non solùm Medicamentorum, sed etiam *Regiminum* idoneorum, & *dieteticorum* adminiculorum, debita subsidia.

§. LXI.

Sicut autem *Medicamentorum*, nempè quatenus *usitatis* à medio Seculo hyperbolis decantantur, fastidiosâ potius quâdam abundantia laboramus, ita est utique optabilius, ut potius pauca quædam è talibus eligantur, quibus fidere liceat, quàm temerè inter incertam atque dubiam farraginem fluctuetur. In hoc verò censu adversus *cruditates*, æque mucidas, atque ipsius etiam *Ventriculi* sensationes aliquas incommodas, laudare possumus, cùm *Arcanum duplicatum* rectè præparatum, tum multò magis, *Nitrum* rectè usurpatum: concurrente imprimis moderatâ dosi *Cinnabaris*. Quò nempe nomine pulvis à D. D. Præside Schediasmate *Mens. Mart.* de usu *Nitri polychresto* laudatus, si prudenter usurpetur, se ipsum etiam tantò magis laudabit; imprimis in illo casu, si juxta vulgatissimam loquendi formulam, simpliciter, non tam solùm à *debili*, quàm sic dicto *frigido* Ventriculo, *atonnia* pendere vulgò dicatur. Quò casu non multas solùm atque diuturnas, sed etiam pretiosas & magnò patientibus emptas, inanes, imò sæpè etiam laboriosas Medicationes, si simplex hic pulvis rectè usurpatus, multoties totò, quod ajunt, stadiò post se relinquit.

§. LXII.

In deducendis autem ad *inferiora* flatibus, insignis ante omnia usus est *Clysterum*; non quidem *acriorum*, sive *stimulantium*, sive *carminativorum*, è calidioribus promiscuè, (nisi quòd in peculiaribus casibus, *phlegmaticæ* imprimis tem-

periei, aliquot guttæ etiam *oleorum destillatorum* in Clystere non contemnendos aliquando effectus edant) sed *Sale* quidem notabiliter conditi, *oleis* verò infusis lenientibus, in insigni copia imbuti. *Supernè*, per os, exhibita remedia, quàm parùm communiter proficiant ad flatum *deorsum* ducendos, peculiaribus exemplis inductus D. D. Præses, tantò facilius postea passim observavit. Inter quæ facilè præcipuum locum sibi vendicat unum, jam suprà tactum, ubi familiarissimi aliàs flatum *deorsum* decedentes, imposterum ita penitus deficiebant, nempè ab *hac via*, ut ultrà tres Menses nusquam unus illac proruperit: benè verò & copiosissimè & constantissimè *sursum* omnes pertenderint. In quo casu usurpata *Laxantia*, quamlibet hunc sui effectum affatim exequerentur, *subsecutionem* tamen ullorum *flatuum*, vel solum sub illo actu Catharticos, nunquam perfecerunt.

§. LXIII.

Certè enim nec etiam sola *provocatio* & velut *inclinatio ad inferiora*, est quod in his casibus sufficiat, nisi solum fortè ad *paroxysmum*; pro constantiore enim effectum, opus profectò est etiam mitigatione vacillantis illius & fluctuantis *anomalie tonice* in Intestinis; quæ certè quibuslibet propemodum *Laxantibus*, (quidquid etiam de *Rhabarbaro* speretur) plus ad fovendos flatum idoneis, si non exasperatur, minimè profectò mitigatur. Huic autem scopo subservire etiam *Europæa* temperatiora *semina* & *radices*, minimè negari debet, sicut etiam *flores* nostratis *Chamomillæ*, non contemnendi sunt; imprimis autem hæc omnia potius ita *simplicia*, aut *Infusione*, aut leni *decoctione* extracta, quàm sub *oleorum destillatorum* formula, nisi quidem *peritissimâ* administratio, & profectò rarior usus, incommoda aliàs metuenda præoccupent. Inter *Radices* autem nequaquam contemni debent *Gentianæ veræ* seu *rubræ*, & *Pimpinellæ albæ* seu *umbelliferæ*. Cæterum allegatus antea casus, evidentissimo, inter multos mitiores, exemplo atque documento fuit, potentissimæ etiam

etiam in hoc genere energię *Pilularum Balsamicarum D. C.* Præsidis; quæ etiam in universo flatulentię affectu, tam ad Summam Negotii, quàm ad exacerbationes, (concurrente solum, si *serius* in usum advocentur, & graviter jam urgentibus *symptomatibus*, *alvus* non rectè respondet, *Clystere* idoneo,) vix ullum aliud remedium non post se relinquunt, & instar plurimorum aliorum ita esse possunt.

LXIV.

Quibus autem cum aliis Affectibus connexa & *conspirans* obtingit Flatulentia, antè omnia cum HÆMORRHOIS, habent quòd curam gerant istorum, ut ita omnia debitò ordine fiant & succedant: ubi imprimis *Mensium* & *Hæmorrhoidum* ratio habenda erit. *Herniarum* quoque insignis occasio ad concipiendos flatus, sicuti satis nota est, ita indiget eò magis decente præcautione partis sic affectæ: Sicut etiam *puerperarum* recentium Venter, & *deligatione*, & *calore* debitò rectè tractandus venit &c. Quæ tamen cum *complicatam* solum rationem habeant cum flatibus, non est quod illis prolixius immoremur. Potius, cum nostro proposito abundè satis fecisse confidamus, colligimus vela, & illis qui hætenus dicta rectè ad animum demittere paratos sese gesserint, etiam ab hujusmodi procellis exoptata Halcyonia pollicemur.

TANTUM.

NOBILISSIMO & CLARISSIMO

DN. CANDIDATO,

Fautori & Amico suo singulariter colendo,

S. P. D.

HEINRICUS KOEHLER, J. U. Stud.

Quantum & Experientiæ, & Circumspectionis, & alacrioris Judicii requiratur ad Studium Medicum, vel ex præstantia & difficultate earum rerum,

rerum, diligenti observatione & rationali demum ex illa deducenda ratiocinatione subigendarum constare potest. Ita se habet naturalium rerum cognitio, de qua sollicitus est Medicus, ut sanitati humanæ non solum ex illa mirificè consulere possit, sed etiam præ aliis capax fiat admirandam Summi Numinis sapientiam, ejusq; singularem in reclusis tam profundis Veritatibus Amorem, cognoscere. Jam verò cum certum sit, Veritates, quò propiores Naturæ, eò altioris esse indaginis, præcipuam hinc laudem merentur, qui Vires ingenii & attentionem in examinandis Veritatibus tam arduis exercent eòq; summò studiò allaborant, ut præeuntibus & cognitis hisce doctrinis possint esse apti ad Corporis humani Vigorem conservandum. Cum itaq; laudabiles CLARISSIME DOMINE CANDIDATE feceris progressus in eruendis tam abditi Naturæ recessibus, lætari omninò de Tuis Studiis Academicis feliciter peractis, Tibique de Specimine, publicâ Disputatione edito gratulari, officii mei esse judico. Scio enim, quâ Animi integritate, quâ constantiâ mecum hætenus fueris conversatus, & quantum ego Voluptatis ex Tua præstanti mihiq; propensa Indole ceperim, neq; adeò minùs miratus sum, quàm solerter & perseveranter Animum ad Studia Tua applicueris, ut tandem scopum Tibi præfixum ex voto consequeris. Sic certè facilè colligere possum, quâ dexteritate impofterum consecutam Tuam eruditionem ad usum translaturus, commodisq; humanis sis inserviturus. Hinc lætus sum de honoribus, quos publicæ commendationis ergò meritò adipisceris, & gratulabundus opto, ut Summus Naturæ Arbiter Tibi, uti adhuc, ita impofterum adsit, viresque Tuas, quas destinasti humanæ incolumitati, semper adaugeat. Ita copia mihi fiet denuò testandi gaudium Animiq; constantiam, quam ut velis ulteriore Tuâ benevolentia excitare, sumè contendo. Vale.

Dabam ex Musæo Id. Octobr. M DCC VIII.